



Spezi Clique 1905 Stamm

Fasnacht 2018

Alles goot dr Bach ab

Me sait zwoor: z Basel AN mym Rhy
mir Bebbi aber mergge's gly
in Rhy wänn mir vyyl lieber DRY!
s dra hogge gniegt ys nämmliig nimme
mir wänn in unsrem Bach go schwimme
zuegää, das gitts jo nit erscht jetze
dass ain sich goot in Rhy go netze
wenn aber bletzlig alli zämme
in unsrem Rhy e Beedli nämme
so richtig Arsch an Arsch – und zwoor
mit Kind und Kegel, Hutt und Hoor
und wenn au dr Regierigsroot
zwoor nur im Waaljoor ohni Boot
aber gschlosse zämme ins Wasser goot
no duet me das erscht sit Achzig kenne
und dr «Basler Rhyschwumm» nenne...
Wo friehner no ehnder s Viech mit Fäädere
und Plastikäntli gsee hesch schwäädere
und - sofärn no lääbig – au mänge Fisch
in ainere Rueh drin gschwänzlet isch
wo d'no dänggd hesch, zum Mitmache muesch jo bleed sy
findsch hitte bym Rhyschwumm scho säxdausig Gleezi
und vyllicht au ab und zue – e Spezi?
Zerscht hett sich d Froog nur drum kenne drille:
isch s Wasser ächtsch suuber – isch's e Gille?
und duet me sich d Schnuure mit Gille fille?
denn friehner isch's jo none e Kloake
oobe Drägg und Oel – unde Fresch und Kraake
bis Schwizerhall' hett me no nit gross gmuggd
und hett alles wo dr Bach ab koo isch, gschluggd
aber denn no nem Gift vo dr Chemie
losst me s'Drigoo zymmlig rasch loo sy...
S Wasser isch root obenaabe koo
d Roche hett Medizin dr Rhy ab gloo
und d Rhy chemisch grainigt, so hett me vernoo
drum gäbs sitthär kai Gfoor mee, wieder yyne z goo...
Gift hi oder här – bletzlig kasch wieder baade
und schynts haig au nie ain e blyybende Schaade...
alles goot dr Bach ab – s wird immer so sy
isch's emoll dr Bach ab, denn isch es gly
uss den Auge, vergässe und verby...
Aber jetz zrugg zum Schwimme im Rhy:
damit uff em Wasser no sicherer bisch
erfindet me dr Wiggelfisch
Zerscht hett aini vo Basel am e Schwimmsagg biggled
denn hett ain vo Leipzig dä wyter entwigget
farbig, poppig und trendig zum di dra hängge
am Aafang diens en no verschängge
an alli, wo im Rhy ihr und Fiidle schwängge
sit 15 Joor isch er nimm ewägg z dängge!
wird zum Kultgeegestand fyr ganzi Horde
und isch kommerziell au im Ussland vermäggedd worde
Abgsee vo allem, vom Sagg und de Schwimmer –
goot au sunscht vyyl dr Bach ab, und zwoor praktisch immer
Wenn hitt ebbis steert, das ka doch nit sy
no landets im Rhy – und mir schiggen ys dry..
s goot zwoor au dr Bach ab, aber nit verby
Hitt butze jedes Joor – ganzi Kolonne
und stossen uff Grümpel – mehreri Tonne
findsch kilowyys Glasfläsche, Büchsen und Doose
Stiehl und Bängg und e Huffe ähnligi Choose
vorallem aber jedi Wett – dass es immer e Kaib voll Velo hett
au Auti haig me scho gsichtet dert unde
für die hett me hald doobe kai Parkplatz mee gfunde...
vyyl Händy, Schiffschruube, en Abspeergitter
e Badussrüschtig vomene Zwitter
Aber nit nur zum Butze goot me in Rhy go wiele
au s Historisch Museum duet drin umme niele
findet Waffe – und bletzlig kunnt no z rugele
vom Mittelalter – e Kanoonekuugele
und uss dääre uusegfischte Bracht
hett me »Uffdaucht« – e gschichtligi Usstellig gmacht
so hett me verschieden Schetz kenne fange
die wäre sunscht au – dr Bach ab gange...
Ehnder no e bitz mee zum Lache
gänn allerhand fiktivi Sache
wo im Rhy Versteggis mache
Zum Bischbill bruuchts e bitzeli Muet
was d Regierig im Rhy verschwinde loo duet
aim vo dääne isch jo schynts währendem Pfuuse
e Milliöönli dr Bach ab – nach St-Louis uuse...
und für das tolli Härzstügg- das kunnt jo au gli
schieisst me dryssig Milliönli im Voruss in Rhy
Und no mänge anderi Fäälblaaniig doo
hett und wird no Spuure im Bach hinterloo
Wo dä Veloring – bach ab – isch, sinn im Rhy unde
Bsunders vyyl alti Göppel verschwunde
umso mee froggsch dy ob si sich jetz no loone
in dr Stadt - die Gratis-Pumpstatioone
also aini wurd länge, so maine mir drogge
im Rothuus – wo die maischte Pumpene hogge
Gliichzyttig syg denn unde no – e alti Gitarre fyyrekoo
die haig me schynts miesse restauriere
denn d Frau Ackermäa bruucht sy - zum Regiere..
Nit im Rhy, aber sunscht sit Joore am Schwimme
isch d Stüggi, aber die bruuchts jo bald nimme
jetzt biggt me dert Kino yyne – mumme dasch jo au bschisse
denn bym Plaza isch jo dr Film au scho grisse...
Und erscht no d Mäss Basel, dä Riesepalascht
wird vo lutter Greessi jetz zur Lascht
und me wintscht si dr Bach ab – mit luttem Gnall
jä, Hochmuet kunnt hald immer vor em Fall...

Aber was au alles dr Bach ab kunnt
fyr di laufte numme denne rund
und de blybsch au numme denne gsund
wenn de trotz em farbige Wiggelfisch
immer ooben an de Wälle bisch
denn magsch no so rassig dr Bach ab goo
gäll, vergissisch am Schluss nit uusez'koo!